

SI MI LAMENTO GIÀ EST ARRESONE

Si mi lamento già est arresone,
chi so pianghinde a donzi istante,
non mi s'allirgat coro e nè persone,
ca tenzo sa tristura dae s'anante.

A un' assimizzante Elena ermosa
isto faghinde una pregadoria:
"ello, ite mi naras, frisca rosa,
chi s'amore lu lasse o lu sighia?"

A mie s'allegria m'est privada,
e mi fatto bestires de nieddu:
si cun ateru ti bio cojuada
'enit a mi oltare su cherveddu.

Pro su faeddu est chi tenzo isettu
e pro cussu est chi so ancora biu;
a lu pigamos de arma e de prettu,
e ti balanzat a chie t'hat serbiu.

Pro cantu chi so biu non ti lasso,
chi m'has arregordare a donz'istante,
oras cantu hat in die bei passo,
pro biere a tie perla e diamante.

De un' assimizzante creatura
naro chi Deus no nd'hat fattu atéra,
bella che retrattu o Ermosura,
lizzu biancu e palma verdedera.

Si est manera sos ojos a ti bie(r),
una promissa m'hat fattu su coro:
su ch'isto discurrende notte e die,
de chie has a benne(r), mela 'e oro!

Non siat calchi moro de Turchia,
chi a malu gustu ti lu cheren dare,
non t'had a mancare gelosia
mancari tenzas benes e dinare.

Su bonu est a istare in unione
cun cuddu pagu ch'had a dare Deu,
menzus che tenne(r) in domo unu verone,⁽¹⁾
o calchi disatentu Cananeu.

De su narrer meu non ti olvides
e calchi die tind'has amentare,
de allegas anzenas non ti fides,
mantenilu su primu faeddare.

Podes cunsiderare it'est patire,
de sas ateras lea esperimentu,
chi no est una die a lu finire,
ch'est una vida intera su turmentu.

No hapas pensamentu cambiadu,
ch'est in pagu su faer un aerru,
senza depere culpa nè peccadu
si ponet a patire in s'inferru.

Cussu disterru ti dana pro vida
e no has a tenne(r) un'ora 'e allegria;
has a narrer: mai esser' naschida,
pro passare sa vida in tribulia.